

摛藻堂四庫全書薈要

集部

欽定四庫全書會要

集部

御選宋詩卷六十五

詳校官原任主事臣李斯咏



欽定四庫全書叢要卷一萬八千三百七十二集部

御選宋詩卷六十五

七言絕句二

歐陽修

班春亭

信馬尋春踏雪泥
醉中山水弄清輝
野僧不用相迎送
來興閒來興盡歸

江行贈雁

雲間征雁水間棲
矰繳方多羽翼微
歲晚江湖同是客
莫辭伴我更南飛

戲贈丁判官

西陵江口折寒梅
爭勸行人把一杯
須信春風無遠近
維舟處處有花開

過中渡

中渡橋邊十里堤
寒梅落盡柳條衰
年年塞下春風晚
誰見輕黃弄色時

得歸還自歎淹留中渡橋邊柳拂頭記得來時橋上過
斷冰殘雪滿河流

豐樂亭遊春

綠樹交加山鳥啼晴風蕩漾落花飛鳥歌花舞太守醉
明日酒醒春已歸

春雲淡淡日輝輝草惹行襟絮拂衣行到亭西逢太守
籃輿酩酊插花歸

紅樹青山日欲斜長郊草色綠無涯遊人不管春將老

來往庭前踏落花

謝判官幽谷種花

淺深紅白宜相間先後仍須次第栽我欲四時攜酒去
莫教一日不花開

畫眉鳥

百囀千聲隨意移山花紅紫樹高低始知鎖向金籠聽
不及林間自在啼

田家

綠桑高下映平川
賽罷田神笑語喧
林外鳴鳩春雨歇

屋頭初日杏花繁

樵者

雲際依依認舊林
斷崖荒磴路難尋
西山望見朝來雨
南澗歸時渡處深

西湖戲作示同遊者

菡萏香清畫舸浮
使君寧復憶揚州
都將二十四橋月
換得西湖十頃秋

夢中作

夜涼吹笛千山月路暗迷人百種花碁罷不知人換世
酒闌無奈客思家

奉使契丹初至雄州

古關衰柳聚寒鴉駐馬城頭日欲斜猶去西樓二千里
行人到此莫思家

夏享太廟攝事齋宮聞鶯寄原甫

四月田家麥穗稠桑枝生椹鳥啁啾鳳城綠樹知多少

何處飛來黃栗留

田家謂麥熟時鳴者為黃栗留出詩義

寄許道人

綠髮方瞳瘦骨輕飄然乘鶴去吹笙郡齋獨坐風生竹
疑是孫登長嘯聲

高樓

六曲雕欄百尺樓簾波不動瓦如流浮雲已映樓西北
更向雲西待月鈎

宿雲夢館

北雁來時歲欲昏
私書歸夢杳難分
井桐葉落池荷盡
一夜西窗雨不聞

簾

銀蒜鈎簾宛地垂
桂叢鳥起上朝暉
枉將玳瑁雕為押
遮掩春堂礙燕歸

柳

雨潤堤長走畫轆
絮兼梨雪墮春煙
東風苑外千絲老
猶伴吳蠶盡日眠

井桐

簷敲碧瓦拂傾梧玉井聲高轉轆轤腸斷西樓驚穩夢
半留殘月照啼鳥

霽後看雪走筆呈元珍判官

江上寒山祇對門野花巖草共嶙峋獨吟羣玉峰前景
閒憶紅蓮幕下人

嘉景無人把酒看縣樓終日獨凭欄山城歲暮驚時節
已作春風料峭寒

春日詞五首

宮壇青陌賽牛回玉琯東風逗曉來不待嶺梅傳遠信
剪刀先放綵花開

試粉東窗待曉迴共尋春柳傍香臺不驚樹裏禽初變
共喜釵頭燕已來

紅霧初開上曉霞共驚風色變年華香車遙認春雷響
庭雪先開玉樹花

玉琯吹灰夜色殘雞鳴紅日上仙盤初驚百舌綠蠻語

已覺東風料峭寒

曉待銅壺剪蠟煤
繡簾春色犯寒來
畫眉不待張京兆
自有新妝試落梅

鶴

樊籠毛羽日低摧
野水長松眼暫開
萬里秋風天外意
日斜閒啄岸邊苔

雁

來時沙磧已冰霜
飛過江南木葉黃
水闊天低雲黯澹

朔風吹起自成行

鶲

依倚秋風氣象豪似欺黃雀在蓬蒿不知羽翼青冥上
腐鼠相隨勢亦高

小池

深院無人鎖曲池葦苔繞岸雨生衣綠萍合處蜻蜓立

紅蓼開時蛱蝶飛

皇后閣端午帖子詞

煙含玉樹風生細日永宮花漏出遲深殿未嘗知暑氣

水精簾覆砌琉璃

蘇舜欽

夏意

別院深深夏簟清石榴開遍透簾明樹陰滿地日當午
夢覺流鶯時一聲

淮中晚泊犢頭

春陰垂野草青青時有幽花一樹明晚泊孤舟古祠下

滿川風雨看潮生

送人還吳江道中作

江雲春重雨垂垂索寞情懷送客歸不憤東風促行棹
羨他雙燕逆風飛

暑中閒詠

嘉果浮沈酒半醺牀頭書冊亂紛紛北軒涼吹開疎竹
卧看青天行白雲

梅堯臣

新井

淺淺清泉似鑑開鱗鱗寒甃未生苔山中亭午野禽渴
不畏人驚欲下來

白牡丹

白雲堆裏紫霞心不與姚黃色鬪深閒伴春風有時歇
豈能長在玉階陰

七月二十一夜聞韓王汝宿城北馬鋪

暗樹秋風擺葉鳴桃枝竹簾冷逾清孤燈淡淡短亭客

夜半蕭蕭聞雨聲

依韻和吳秀野馬上口占

谿頭三月草菲菲
城畔春游惜醉稀
莫信杜鵑花上鳥
人歸猶道不如歸

書事和韓子華舍人

見憑蝴蝶過牆飛
却夢翩然入綺幃
欲撲翅輕縈不住
覺時疑有粉沾衣

蔡襄

夢中作

白玉樓臺第一天琪花風靜彩鸞眠誰人得似秦臺女
吹徹雲簫上紫煙

別宋判官

縷縷青陰拂去鞍雨花狼籍顫春寒年光別緒侵人鬢
莫向離亭子細看

聞福昌院春日一川花卉最盛

山前溪上最宜春千樹夭桃一向新爭得扁舟隨水去

亂花深處問秦人

訪陳處士

橋畔修篁下碧溪君家原在此橋西來時不似人間世
日暖花香山鳥啼

宿揚州

瓜洲堰埭阻行橈更等江頭後信潮獨背殘燈數歸路
風傳寒柝夜迢迢

離錢塘

迎潮小舸滿旗風迴首津亭暮靄中惆悵今宵歸去夢

迢迢直至海門東

呈沈子山

荷葉新詞天下工玉人垂手倚秋風一聲清唱穿雲去
斜日烘簾曲未終

六月閩溪荔子丹新秋猶喜薦雕盤自嗟千里歸程遠

不得繁枝雨後看

夢遊洛中十首

并序
錄二首

九月朔予病在告晝夢遊洛中見嵩陽居士留詩
屋壁及寤猶記兩句因成一篇思念中來續為十

首寄呈太平楊叔武

天際烏雲含雨重樓前紅日照山明

夢中

兩句

嵩陽居士今

安否青眼看人萬里情

司門員外郎王益恭年四十餘
致政歸洛中自號嵩陽居士

霜後丹楓照曲堤酒闌明月下前溪石樓夜半雲中嘯

驚起沙禽過水西

從尹師魯宿
香山石樓

江村

黯淡江村春日斜汀洲芳草野田花孤舟橫笛向何處

竹外炊煙一兩家

方山渡口占

江上行人空自愁壯年雙鬢已驚秋不知風裏千重浪
何事無情也白頭

宿漁梁驛

庭樹疎疎河漢低瓦溝霜白月平西寒鴉不奈單棲苦
落泊驚飛到曉啼

桃花洞

洞裏花開無定期落紅曾見逐泉飛仙人應向青山口
管却春風不與歸

度南澗

隱隱飛橋隔野煙石磯西畔間漁船桃花盡日隨流水
洞在清溪何處邊

入天竺山留客

山光物態弄春暉莫為輕陰便擬歸縱使晴明無雨過

入雲深處亦霑衣

秋日

城頭蔓草受新霜天外孤鴻叫夕陽送客情懷楓樹老
著人襟袖菊花香

春日

東風吹雨濕鞦韆紅點棠梨爛欲然擬買芳華贈年少
紫榆春淺未成錢

劉敬

王津園

垂楊冉冉籠清禦
細草茸茸覆路沙
長閑園門人不入
禁渠流出雨殘花

水寺

早時風景愛東吳
一到京師興益疎
偶向城南疑澤國
夾川垂柳帶僧居

春草

春草絲絲不可名
水邊原上亂抽榮
似嫌車馬繁華處

才入城門便不生

雨後登坐嘯亭

風捲高花舞成雪雨滋芳草綠侵雲屏軒獨立時惆悵
淮北春光過五分

黃薔薇

綠葉黃花相映深水邊臺畔結浮陰何人解賞傾城態
一笑春風與萬金

琵琶亭

江頭明月琵琶亭一曲悲歌萬古情欲識當時腸斷處
只應江水是遺聲

小園春日

草色初新柳帶長宿煙朝露濕初陽東山雲起西山碧
南舍花開北舍香

十月二日

十月黃河冰未澌柳條弱弱草離離寒蛩逐馬聲相續
却是江南秋半時

登城微雨

雨映寒空半有無，重樓閒上倚。
城隅淺深山色高低樹。

一片江南水墨圖

絕句

青苔滿地初晴後，綠樹無人晝夢餘。
惟有南風舊相識，徑開門戶又翻書。

鎖宿禮部中夜口號

浮雲不動月微明，錦帳香寒夢易驚。
猶覺春風花未發。

獨聞宮漏出重城

齊滿

長日薰風春欲回啼鶯鳴鵠亂相催不嫌柳絮多飛盡
仍許酴醿取次開

劉攽

題館壁

壁門金闕倚天開五見宮花落古槐明日扁舟江海去
却從雲氣望蓬萊

秋蓮度

登樓

莎青石細淺見底天空雲淡無一毫波間圓月照不動
海上清風來最高

黃庶

探春

雪裏猶能醉落梅好營杯具待春來東風便試新刀尺

萬葉千花一手裁

望春偶書

信馬尋春上古原天工一幅繡平川花應笑我將詩句
便當遊人費萬錢

次韻和真長四季牧童

錄二首

怯雨宜晴不識愁去隨青草牧春牛無人古路歌兼笑
歸去山花插滿頭

曉牧侵星大暑天晝尋芳樹綠陰眠惜牛不使衝殘日
歸帶黃昏飲小川

張公庠

宮詞

曉露溟濛似有無半殘紅燭動金鋪黃鶯不語梨花上
錯認徐熙舊畫圖

四部韶音進玉卮千官傾望柘黃衣舞頭再拜金階遠
畫鼓連催卷隊歸

二月猶寒未有雷江梅纔謝小桃開宮娥不放珠簾下
待得東風送燕來

盡道今來花信遲
凌晨宮女探春歸
寒梅一朶金盤小
已有清香拂御衣

過苑中官排辦時江梅初綻兩三枝
春寒呵手晨妝罷
簾外人催送駕遲

再坐千官花滿頭
御香煙上紫雲樓
萬人同向青霄望
鼓笛聲中度彩球

後苑宸遊炎日長
宮中強半坐迴廊
鴉鵲瀨鷓鴣銀塘靜

楊柳梧桐水殿香

萬字闌干菊半開更憐清露點莓苔仙韶使副呈新譜
得旨重陽侍宴來

清旦宮中候上番銀潢輕淡玉鈎殘山茶破萼江梅發
盡倚朱闌不避寒

上番宮女捲簾時閃閃寒鴉拂曉啼纔著赬袍催進輦
紫宸門外報班齊

銀漢橫斜近建章九重深靜閑蘭房六更未覺晨光動
自是仙家日月長

萱草初長花未開共知青帝領春回珠簾捲上瓊鈎穩
不礙薰風滿殿來

太皞祠壇數級紅青旛搖曳日朦朧人間未覺東風至
先入宜春小院中

西苑春深奉翠華朱闌千萬護珍葩不如直上紅樓去
盡見瓊林十里花

碧瓦鴛鴦勢欲飛禁門深靜日遲遲玉簫吹遍新傳譜
坐看黃鸝數換枝

月華浮動上階稜侍宴歸來掩繡屏子夜酒醒蘭燭暗
碧紗窗外度流螢

宴起昭陽索輦時鑪香偏上賴紅衣金門玉砌明如畫
宮女三千把燭歸

夾城西畔半毬場彩仗彎彎人對行一樣驛驅三百匹
金羈更伴綠遊轡

晚春途中

一年春事又成空擁鼻微吟半醉中夾路桃花風雨過

馬蹄無處避殘紅

徐徽

金獅潭渡

金獅潭上水悠悠
兩岸垂楊客舍秋
十里清江民物阜
錦帆直到石梁頭

曾鞏

瑯琊溪

野草山花夾亂流
橋邊旌旆影悠悠
即應要地無人見

可忍開時不出遊

詠柳

亂條猶未變初黃
倚得東風勢便狂
鮮把飛花蒙日月
不知天地有清霜

憶越中梅

浣紗亭北小山梅
蘭渚移來手自栽
今日舊林冰雪地
冷香幽豔向誰開

西樓

海浪如雲去却回
北風吹起數聲雷
朱樓四面鈎疎箔
卧看千山急雨來

出郊

葛葉催耕二月時
斜橋曲岸馬行遲
家家賣酒清明近
紅白花開一兩枝

李觀

鄉思

人言落日是天涯
望極天涯不見家
已恨碧山相阻隔

碧山還被暮雲遮

曉角

腸斷城頭畫角聲
燈青月黑酒微醒
濃香夢裏何曾管
只有離人夜夜聽

烏鵲

烏鵲翩翩競羽毛
南飛無樹過良宵
就中管得他人事
祇與天孫倩作橋

睡起

簾卷鱗紋帳繫紗六龍西降樹陰斜祇因夢裏成蝴蝶
猶記南園數種花

姚嗣宗

題空同山寺

南粵干戈未息肩五原金鼓又轟天空同山叟笑無語
飽聽松聲白晝眠

仲訥

負暄閒眠

茅簷晴日暖如春一枕釣天樂事新滿眼繁華皆得意
午眠安穩却無人

唐詢

山堂偶書

在處煙雲早晚生自疑呼吸氣皆靈十年夢寐江山裏
今見江山入戶庭

為杭州日送客舟中

山雨霏微不滿空畫船來往疾輕鴻誰知獨卧朱簾裏

一榻無塵四面風

陶弼

途次葉縣覩千葉桃花

三月官桃滿上林
一花千萼費春心
葉公城外襄河北
一樹無人色更深

登潮月亭

渡頭人語知潮上下
看南江東北流試引輕帆學歸去

茶山溪淺却迴舟

周敦頤

題春晚

花落柴門掩夕暉
昏鴉數點傍林飛
吟餘小立闌干外
遙見樵漁一路歸

經古寺

琳宮金刹接林巒
一徑潛通竹塢寒
是處塵埃皆可息
時清終未忍辭官

江上別石郎中

落葉蟬聲古渡頭
沙灘人擁欲行舟
別離情似長江水
遠亦隨君日夜流

邵雍

天津感事

雲輕日淡天津暮
風急林疎洛水秋
獨步獨吟人莫會
時時鷗鷺下汀洲

煙樹盡歸秋色裏
人家常在水聲中
數行旅雁斜飛去
一簇樓臺峭倚空

綠水悠悠際碧天平蕪更與遠山連白頭老叟心無事

閒凭闌干看洛川

水流任急境常靜花落雖頻意自閒不似世人忙裏老
生來未始得開顏

依韻和君實端明洛濱獨步

風背河聲近亦微斜陽淡泊隔雲衣一雙白鷺來煙外
將下沙頭又却飛

暮春吟

林下居常睡起遲那堪車馬近來稀春深晝永簾垂地

庭院無風花自飛

張俞

金剛臺

霧山環合自雲川戶有清溪種玉田萬本桃花不知處
幾人曾得問秦年

張在

題龍興寺老柏院

南鄰北舍牡丹開年少尋芳去又回唯有君家老柏樹
春風恰似不曾來

楊備

金陵覽古雜詠錄十首

汝南灣

汝南王昔過江東此地名將汝海同玉掌濯來人易醉
有時人面照花紅

濛汜池

春條拂岸柳如金一鑑澄空照底深傍見龍舟赭袍影
分明紅日在池心

九日臺

甲光如水戟如霜御酒杯浮菊半黃東日西風滿天仗
簫韶一部奏清商

桃葉渡

桃葉桃根柳岸頭獻之才調頗風流相看不語橫波急
艇子翻成送莫愁

幕府山

六代繁華一瞬間平蕪遠樹不勝閒倚樓天暝雲如幕
知是瑯琊幕府山

橫塘

早潮纔過晚潮來一一軒窗照水開鑑面無塵風不動
分明倒影見樓臺

白都山

駕鶴驂鸞自古聞策名仙籍是真君天邊舊跡無尋處

滿目青山空白雲

春磵

手拖葛屨坐藤牀竹樹蕭然一水蕩枕上白雲船下月
卜鄰東磵勝東岡

烏衣巷

人物風流往事非空餘陋巷作烏衣舊時簾幙無由覓
祇有年年新燕飛

白鷺洲

春信風生晚汛潮印沙羣鷺立還翹凭高一片迷人眼
蘆葦叢邊雪未消

雙蓮堂

雙蓮倒影面波光翠蓋風搖紅粉香中有畫船鳴鼓吹
暫然驚起兩鴛鴦

司馬光

皇后閣春帖子

春衣不用蕙蘭薰緣領無加刺繡紋曾在蠶宮親織就

方知縷縷是辛勤

酬華嚴真師

知足隨緣處處安一身溫飽不為難
禪房窄小纔容膝此外從他世界寬

邊將

月白星稀霜氣多
卷旗束甲涉慈河
田家不覺官軍渡
夜半只聞風雨過

邵堯夫許來石閣久待不至

淡日濃雲合復開碧岑清洛遠繁迴林端高閣望已久
花外小車猶未來

獨步至洛濱

草軟波清沙徑微手攜筇竹著深衣白鷗不信忘機久
見我猶穿岸柳飛

范鎮

七夕

翠幙瑤梯百尺樓樓前星斗自悠悠天家仙會能多少

未到平明已別愁

王珪

宮詞一百首

錄三十一首

花裏宮鶯曉未啼千牛仗下報班齊銀袍五百趨龍尾

天子臨軒賜御題

洛陽新進牡丹叢種在蓬萊第幾宮壓曉看花傳駕入
露苞初坼御袍紅

侍輦歸來步玉階試穿金縷鳳頭鞋堦前摘得宜男草

笑插黃金十二釵

瑤臺夜滴金莖露水殿涼生玉枕風卧看星河歸閣晚
月斜疎影轉梧桐

燕子初來語更新一聲聲報內家春遙聞上苑櫻桃熟
先進金盤奉紫宸

盆山高疊小蓬萊檜柏屏風鳳尾開綠遶金堦春水闌
新分一脈御溝來

內苑宮人學打毬青絲飛控紫驛駘朝朝結束防宣喚

一樣真珠絡轡頭

夜深獨倚闌干角玉笛橫吹弄月明餘響度雲無處覓人間聞得兩三聲

元夕星燈照露臺六宮歌吹出雲來夜深翠輦歸金殿十里迴廊錦帳開

沈煙搖碧透金鋪密下珠簾鎮玉壺近賜趙昌花雀幃却嫌崔白芟荷圖

黃昏鎖院聽宣除翰長平明趁起居撰就白麻先進草

金泥降出內中書

石刻蛟螭扶繡柱
金盤龍鳳走雕楹
萬年枝上流鶯轉
屏掩春山夢不成

紅濕春羅染御袍
透簾三丈日華高
金針玉尺裁縫處
一對盤龍落剪刀

侍女爭傳玉彈弓
金丸飛入亂花中
一時驚起流鶯散
踏落殘英滿地紅

山樓彩鳳棲
寒月宴殿金麟吐
御香蜀錦地
衣呈隊舞

教頭先出拜君王

曉吹翩翩動翠旗
爐煙千疊瑞雲飛
何人奏對偏移刻
御史天香隔繡衣

金井秋啼絡緯聲
出花宮漏報嚴更
不知誰是金鑾直
玉宇沈沈夜氣清

內庭秋燕玉池東
香散荷花水殿風
阿監採菱牽錦纓
月明猶在畫船中

紗幔薄垂金麥穗
簾鈎纖挂玉蕙條
樓西別起長春殿

香壁紅泥透蜀椒

清曉自傾花上露冷侵宮殿玉蟾蜍擘開五色銷金紙

碧鎖窗前學草書

宮女薰香進御衣殿前開鎖請金匙朝陽初上黃金屋
禁掖春深晝漏遲

內人稀見水鞦韆爭擘珠簾帳殿前第一錦標誰奪得

右軍輸却小龍船

禁裏春濃蝶自飛御蠶眠處弄新絲碧窗盡日教鸚鵡

念得君王數首詩

鬪草深宮玉檻前
春蒲如箭荇如錢
不知紅藥闌干曲
日暮何人落翠鉢

太液波清水殿涼
畫船驚起宿鴛鴦
翠眉不及池邊柳
取次飛花入建章

釣線沈波漾彩舟
魚爭香餌上龍鉤
內人急捧金盤接
撥刺紅鱗躍未休

露井銀牀凍不收
深宮花暗曉鶯愁
殘紅滿地無人埽

一半隨風落御溝

盤龍新織翠雲裘
檢點黃封玉匣收
防備秋衣供御著
金箱捧入曝衣樓

黃金掌上露華稀
朝退君王索輦遲
到得經筵春講罷
海棠花影數磚移

麗日祥煙鎖禁林
櫻桃初熟杏成陰
年年翠輦來遊幸
花落春階一寸深

六龍觀稼奉宸遊
齊賀豐年薦麥秋
後苑宴回卿相出

內官金盒送來辦

雪晴鶼鵠樓邊月風落昭陽殿後梅爐炭熾消香獸暖
獨拈香筋撥紅灰

端午帖子詞

禁幕無風日正亭侍臣初賜玉壺冰不知翠輦遊何處
應在瑤臺第一層

王安石

春郊

青秧漫漫出初齊
雞犬遙聞路却迷
但見山花流出水
那知不是武陵溪

春風

春風過柳綠如繅
晴日烝紅出小桃
池暖水香魚出處
一環清浪湧亭皋

歸庵

稻畦藏水綠秧齊
松鬚初乾尚有泥
縱蹇尋岡歸獨卧
東庵殘夢午時雞

池上看金沙花數枝過酴醿架盛開二首

午陰寬占一方苔映水前年坐着我紅蕊似嫌塵染污

青條風上別枝開

酴醿一架最先來夾水金沙次第裁濃綠扶疎雲對起

醉紅撩亂雪爭開

出郊

川原一片綠交加深樹冥冥不見花風日有情無處著
初迴光景到桑麻

同熊伯通自定林過悟真二首

與客東來欲試茶
倦投松石坐欹斜
暗香一陣連風起
知有薔薇澗底花

城郭紛紛老倦尋
幅巾來寄北山岑
長遭客子留連我
未快穿雲涉水心

烏塘

烏塘渺渺綠平堤
隄上行人各有攜
試問春風何處好
辛夷如雪柘岡西

金陵

金陵陳迹老莓苔南北遊人自往來最憶春風石城塢
家家桃李過牆開

午枕

午枕花前簾欲流日催紅影上簾鈎窺人鳥喚悠颺夢
隔水山供宛轉愁

斜徑

斜徑偶通南埭路數家遙對北山岑草頭蝶蝶黃花晚

菱角蜻蜓翠蔓深

木末

木末北山煙冉冉草根南澗水泠泠繚成白雪桑重綠
割盡黃雲稻正青

禁中春寒

青煙漠漠雨紛紛水殿西廊北苑門已著單衣猶禁火
海棠花下怯黃昏

江上

江北秋陰一半開
晚雲含雨却徘徊
青山繚繞疑無路
忽見千帆隱映來

若耶溪歸興

若耶溪上踏莎苔
興罷張帆載酒回
汀草岸花渾不見
青山無數逐人來

即席

曲沼融融泮盡澌
暖煙籠瓦碧參差
人情共恨春猶淺
不問寒梅有幾枝

江寧夾口二首

茅屋滄洲一酒旗午煙孤起隔林炊江清日暖蘆花起
恰似春風柳絮時

落帆江口月黃昏小店無燈欲閉門側出岸沙楓半死
繫船應有去年痕

試院中

白髮無聊病更侵移牀卧竹向秋陰朝來雁背西風急
吹折江湖萬里心

咫尺淹留可奈何東風虛共一姮娥
暗前棗樹應搖落此夜清光得幾多

春日

柴門照水見青苔春繞花枝漫漫開路遠遊人行不到
日長啼鳥去還來

書汜水關寺壁

汜水鴻溝楚漢間跳兵走馬百重山如何咫尺商於地
便有園公綺季閑

赴召道中

海氣冥冥漲楚氛
汀洲回薄水橫分
青松十里鍾山路
祇隔西南一片雲

遇雪

定知花發是歸期
不奈歸心日日歸
風雪豈知行客恨
向人更作落花飛

獨卧

茅簷午影轉悠悠
門閑青苔水亂流
百轉黃鸝看不見

海棠無數出牆頭

杏花

垂楊一徑紫苔封人語蕭蕭院落中獨有杏花如喚客
倚墻斜日數枝紅

城東寺菊

黃花漠漠弄清暉無數蜜蜂花上飛不忍獨醒孤爾去
慙勤為折一枝歸

鍾山絕句

澗水無聲遶竹流竹西花草弄春柔茅簷相對坐終日

一鳥不鳴山更幽

招楊德逢

山林投老倦紛紛獨卧看雲却憶君雲尚無心能出岫
不應君更嬾於雲

金山

北楫南檣泊四垂共憐金碧爛參差孤根萬丈滄波底
除却蛟龍世不知

波瀾蕩沃乾坤大氣象包藏水石間祇有此中宜曠望
誰令天作海門山

遊鍾山

兩山松櫟暗朱藤一水中間勝武陵午梵隔雲知有寺
夕陽歸去不逢僧

汀沙

汀沙雪漫水溶溶睡鴨殘蘆晦靄中歸去北人多憶此
每家圖畫有屏風

東江

東江木落水分洪伐盡黃蘆洲渚空南澗夕陽煙自起
西山漠漠有無中

北望

欲望淮南更白頭杖藜蕭颯倚滄洲可憐新月為誰好
無數晚山相對愁

信州迴車館中作

太白山根秋夜靜亂泉深水遶牀鳴病來空館聞風雨

恰似當年枕上聲

寄伯兄

身留海上上去何時祇看春鴻北向飛安得先生同一飲
蕨芽香嫩鱉魚肥

題畫扇

玉斧修成寶月團月邊仍有女乘鸞青冥風露非人世
鬢亂釵斜特地寒

初晴

幅巾慵整露光華度隴深尋一徑斜小雨初晴好天氣
晚花殘照野人家

南蕩

南蕩東陂水漸多陌頭車馬斷經過鍾山未放朝雲散
柰此黃梅細雨何

南浦

南浦東岡二月時物華撩我有新詩含風鴨綠粼粼起
弄日鶯黃裊裊垂

竹裏

竹裏編茅倚石根，竹莖疎處見前邨。
自有春風為埽門。

初夏即事

石梁茅屋有磽磽，流水濺濺度兩陂。
晴日暖風生麥氣，綠陰幽草勝花時。

東坡二首

東坡風雨卧黃雲，塍水翻溝隔隴分。
春玉取新知不晚。

腰鎌今日已紛紛

荷葉初開筍漸抽東陂南蕩正堪遊無端隴上脩脩麥
橫起寒風占作秋

北陂杏花

一陂春水繞花身花影妖嬈各占春縱被春風吹作雪
絕勝南陌碾成塵

溝上梅花欲發

亭亭背暖臨溝處脈脈含芳映雪時莫恨夜來無伴侶

月明還見影參差

北山

北山輸綠漲橫陂直慙回塘灔灔時細數落花因坐久
緩尋芳草得歸遲

山櫻

山櫻抱石蔭松枝比並餘花發最遲賴有春風嫌寂寞
吹香渡水報人知

鍾山晚步

小雨輕風落楝花細紅如雪點平沙槿籬竹屋江村路
時見宜城賣酒家

書湖陰先生壁

茅簷長埽靜無苔花木成畦手自栽一水護田將綠遶
兩山排闥送青來

戲贈段約之

竹栢相望數十楹藕花多處復開亭如何更欲通南埭
割我鍾山一半青

望淮口

白煙瀰漫接天涯
黯黯長空一道斜
有似錢塘江上望
晚潮初落見平沙

入瓜步望揚州

落日平林一水邊
蕪城掩映祇蒼然
白頭追想當時事
幕府青衫最少年

泊船瓜洲

京口瓜洲一水間
鐘山只隔數重山
春風自綠江南岸

明月何時照我還

欽定四庫全書

御選宋詩卷六十五

御選宋詩卷六十五

謹案第十一頁後八行山光物態弄春暉按全唐
詩本係張旭山行留客詩此編在蔡襄入天竺
山留客題下疑沿愚惠集之訛

--	--	--	--	--	--	--	--	--

總校官庶吉士臣侍朝

校對官檢討臣蕭九成

謄錄舉人臣李駟



欽定四庫全書叢要

集部

御選宋詩卷六十六

詳校官原任主事臣李斯咏



欽定四庫全書
欽定四庫全書
欽定四庫全書

集部

御選宋詩卷六十六

七言絕句三

王安國

夢至靈芝宮為詩紀之

萬頃波濤木葉飛笙歌宮殿號靈芝揮毫不似人間世

長樂鐘聲夢覺時

韓維

洛城雜詩

楊寺丞持詩見尋不遇

分從柳外楊鞭去同作花前載酒行題得新詩無處寄
雜英飛絮滿春城

洗馬澗

洗馬澗邊芳樹密闌干仍在碧流西香檀亂拍朱絃急
應有遊人醉欲迷

上東門外

上東門外春三月桑葉陰陰覆菜花密竹亂流行徑絕
桔槔鳴處是人家

太后閣春帖子詞

金花鏤勝隨春燕綵仗繁絲逐土牛迎得韶華入中禁
和風次第遍神州

綵仗朝來散玉京綺窗新綱結初晴靜呼宮女教調曲
闋引皇孫看學行

展江亭海棠

占盡人間麗與華白頭判得醉流霞誰將法錦翻新樣
紅綠裝成遍地花

和杜孝錫展江亭

斜日低雲動水光偶尋幽處閱羣芳城闈不隔和風度
吹過千花百草香

驚鶯飛鳴避畫橈遊人笑語過朱橋賈家園裏花應謝
綠遍牆頭野杏梢

題崔象之侍郎家海棠

濯錦江頭千萬枝當年未解惜芳菲而今得向君家見

不怕春寒雨濕衣

先忠獻帥蜀愚兄弟皆侍行時年尚少

范純仁

獨遊石巖寄諸友

亂石巉空聳翠稜攀蘿尋勝逐溪聲愛山懷友情無限
日暮巖邊獨記名

題李子高虞部園

今時難得是高人里社因君俗愈醇松竹漸成風月好

只應終日聽韶鈞

偶成

橫笛佳人用意深
數聲高起湧湖陰
梅花落盡還堪惜
留取殘英伴醉吟

西湖四時四首

白鷺文鴛鑑裏飛
紅橋朱閣影參差
疎林密雪皆堪賞
不特尋芳避暑時

萬頃琉璃蹙翠鱗
日遲風暖物華新
千花百草遊人路

應謂壺中別有春

深堂高閣啓清風，舟泛荷香柳影中。
日月待公逃醉飲，官無拘檢是琳宮。

持國微之皆領崇福官

夕陽照水晚，登樓皎月涵。
波夜汎舟珍重前賢，開展意中年。
常願守閑州宋相詩願賜
閑州不計年

呂誨

寄堯夫

江頭五日艤輕舟，欲去遲遲更自留。
目斷旌旗暮天闊，

龍峰峰上倚層樓

去年同作南遷客今日更持刺史權推挽試知民吏意
無因談會向尊前

碧草茸茸照綠波暮春歸客興如何滄浪應有清潭處
羞見漁人鼓枻歌

鄭俠

大水除廳前小屋

庭下新來不掩門灑然無復舊時喧小鋤輕甕從茲起

無補清時合灌園

沈括

姑孰

新晴渡口百花香
石子池頭鴨弄黃
捲幔夕陽留不住
好風將雨過梅塘

沈遘

使還雄州曹使君夜會戲贈

粉面嬌環紅繡裙
主翁獨遣勸佳賓
他時金谷重相遇

還許尊前問故人

還家自戲

憶昨邊城初見春纖纖垂柳正矜新不知遠客貪歸意
欲把狂絲繫畫輪

沈遼

遊瑞巖

已恨初年不學仙老來何處更參禪西風搖落歲將晚

臥對高巖看落泉

方池

森森古木蔭方池
池上秋來一夕知
墜葉沈波清徹底
倚闌無事看魚嬉

宿浯溪

孤蓬衝雨出湘西
欲向崖間寄一棲
天外月華如有意
故來相伴宿浯溪

蟬娟亭

天邊新月一弦生
堂上美人肢體輕
何似君家庭下竹

孤風高節照人清

白水

九江水色白如雪
流水瀟湘尚未渾
落日墟頭人已散
獨留煙樹送黃昏

花殘

花發花殘都不知
誰將白髮更題詩
山西日永無多事

閑看樵夫數局碁

次韻奉酬公諷短句

紅葉飄蕭下石臺
埽除山徑半天開
百年老木和煙斫
萬頃晴天看月來

奉陪穎叔賦欽院牡丹

昔年曾到洛城中
玉椀金盤深淺紅
行上荆溪溪畔寺
媿將白髮對東風

池陽

寒煙寂寂鎖青谿
圓月亭亭上曲堤
小杜風情遙可想
閑調絲竹舞金泥

初泊磁湖

時子瞻在齊安

歸舟不解洞庭帆
舟上騷人雪滿簪
小駐武昌江北岸

春風今夜泊江南

盧秉

書驛舍

青衫白髮病參軍
旋耀黃梁置酒尊
但得有錢留客醉
也勝騎馬傍人門

王令

渰渰

渰渰輕雲弄落暉
壞簷巢漏燕來歸
小園桃李東風後
却看楊花自在飛

白雞冠花

如飛如舞對瑤臺
一頂春雲似剪裁
誰遣移根蓂莢畔
玉雞應為太平來

孤雲

一片孤雲逐吹飛
東風終日竟何依
傍人莫道能為雨

惟恨青山未得歸

聞促織

衰草風來響不知破窗燈滅月藏輝白頭老婦無機織
卧聽鄰兒慢擣衣

溪上

溪上清連樹老蒼竹穿溪樹踏青陽溪深樹密無人處
祇有幽花度水香

方維深

過黯淡灘

溪流怪石礙通津一一操舟若有神自是世間無妙手
古來何事不由人

程顥

草堂

寺在竹林之心
其竹蓋將十頃

參差臺殿綠雲中四面簷簷一徑通會讀華陽真誥上
神仙居在碧琳宮

九日訪張子直承出看花戲書學舍

桃李飄零杏子青滿城。車馬響春霆就中得意張公子。

十日看花醉不醒。

偶成

雲淡風輕近午天。傍花隨柳過前川。時人不識予心樂。
將謂偷閑學少年。

送呂晦叔赴河陽

曉日都門颭旆旌。晚風銃吹去三城。知公再為蒼生起。

不是尋常刺史行。

贈司馬君實

二龍閑卧洛波清
今日都門獨餞行
願得賢人出處始
知深意在蒼生

程頤

游嵩山

鞭羸百里遠來遊
巖谷陰雲暝不收
遮斷好山教不見
如何天意異人謀

張載

別館中諸公

九天宮殿鬱岧峣碧瓦參差接絳霄藜藿野心雖萬里
宣無清戀向皇朝

芭蕉

芭蕉心盡展新枝新卷新心暗已隨願學新心養新德
旋隨新葉起新知

貝母

貝母階前蔓百尋雙桐盤繞葉森森剛強顧我蹉跎甚

時欲低柔警寸心

文同

上亭北軒對月吹笛得才元舍人昭華引醉霜
月草堂吟皆詩譜也

澈灑金波瀉碧空隔霜寒影下征鴻夜深一笛昭華引
吹滿千巖萬壑中

羣山暝色煙開後遠水寒光雨過時今夜何人醉霜月
卧聽緜嶺玉參差

涪江東岸有雲林巒嶺縈洄澗谷深何事遲留未歸去
強顏猶唱草堂吟

初雪

一色陰雲蔽曉空粉英瓊屑亂茸茸不知遊騎將何處
已失南城玉柱峰

約春

去歲相違恨已賒今年相遇喜無涯紅情綠意知多少
盡入涇川萬樹花

和何靖山人海棠

為愛香苞照地紅
倚闌終日對芳叢
夜深忽憶高枝好
把酒更來明月中

春寒

東風何事力猶微
凜凜邊寒犯客衣
舊雪未消新雪下
南園春色幾時歸

郡學鎖宿

長柏高柟蔭廣庭
夜涼人靜夢魂清
不知山月幾時落

每到曉鐘聞雨聲

亭口

林下翩翩雁影斜
滿川紅葉映人家
巖頭孤寺見橫閣
有客獨來登暮霞

送堅甫同年

春風吹雪滿西窗
此夜無人對酒缸
若到杭州見蘇子
為言常夢過松江

憶西湖舊遊

西湖晴碧晚溶溶與客常來坐好風記得有人歌小玉
月明猶在畫船中

還李中舍奉使集

奉使道中詩百首古人遺落盡冥搜自憐吳蜀佳山水
一夜燈前得遍遊

中梁山寺

上方梯磴繞巖頭誰就孤高更起樓直望漢江三百里
一條如線下洋州

晚雪湖上寄景孺

朔風吹雪滿橫湖
衆鳥歸棲日欲晡
獨坐水軒人不到
滿林如挂暝禽圖

暝禽圖景孺所藏之奇畫也

過青泥

鐵山正月雪交加
欲探東風未有涯
纔過青泥春便好
水邊林下見梅花

徐積

宿溪亭

一榻溪亭直萬錢
滿牀明月伴閑眠
荷花不把秋香惜
又逐西風到枕前

麻姑二首

折盡青林多少花
麻姑却在蔡經家
瑤臺好醉無人醉
鳳怨鸞棲空暮霞

不道風塵良苦辛
却停仙仗醉紅塵
青鸞一去無消息
只被麻姑誤殺人

水仙

昨夜曾遊洛女家
自知此處勝煙霞
迴鸞更按湘妃曲
醉踏煙波弄月華

織女

此中非不愛羅衣
月曉霜寒不下機
織得羅成還不著
賣錢買得素絲歸

送呂清叔

慘淡黃昏天欲雪
蕭蕭淮浦人聲絕
風擊寒雲雁正鳴
客眠孤棹燈將滅

蘇軾

六月二十七日望湖樓醉書五絕

黑雲翻墨未遮山
白雨跳珠亂入船
卷地風來忽吹散
望湖樓下水如天

放生魚鼈逐人來
無主荷花到處開
水枕能令山俯仰
風船解與月徘徊

烏菱白芡不論錢
亂繫青菰裏綠盤
忽憶嘗新會靈觀
滯留江海得加餐

獻花遊女木蘭橈細雨斜風濕翠翹無限芳洲生杜若
吳兒不識楚詞招

未成小隱聊中隱可得長閒勝暫閒我本無家更安往
故鄉無此好湖山

吉祥寺賞牡丹

人老簪花不自羞花應羞上老人頭醉歸扶路人應笑
十里珠簾半上鈎

沈諫議召遊湖不赴明日得雙蓮於北山下作

一絕持獻沈既見和又別作一首因用其韻

湖上棠陰手自裁問公更得幾回來水仙亦恐公歸去
故遣雙蓮一夜開

詔書行捧縷金牋樂府聽歌相府蓮莫忘今年花發處
西湖西畔北山前

望海樓晚景五絕

海上濤頭一線來樓前指顧雪成堆從今潮上君須上
更看銀山二十九

橫風吹雨入樓斜壯觀應須好句誇雨過潮平江海碧
電光時掣紫金蛇

青山斷處墻層層隔岸人家喚欲鷺江上秋風晚來急
為傳鐘鼓到西興

樓下誰家燒夜香玉笙哀怨弄初涼臨風有客吟秋扇
拜月無人見晚妝

沙河燈火照山紅歌鼓喧呼語笑中為問少年心在否
角巾欹側鬢如蓬

六和寺冲師闡山溪為水軒

欲放清溪自在流
忍教冰雪落沙洲
出山定被江潮涴
能為山僧更少留

後十餘日復至

東君意淺著寒梅
千朵深紅未暇裁
安得道人殷七七
不論時節遣花開

戲贈

惆悵沙河十里春
一番花老一番新
小橋依舊斜陽裏

不見樓中垂手人

贈孫莘老

天目山前綠浸裾碧瀾堂下看銜艤作隄捍水非吾事
閒送苕溪入太湖

夜來雨洗碧巒峩浪湧雲屯繞郭寒聞有弁山何處是
為君四面竟求看

夜橋燈火照溪明欲放扁舟取次行暫借官奴遣吹笛
明朝新月到三更

三年京國厭藜蒿長羨淮魚壓楚糟今日駱駘橋下泊
恣看修網出銀刀

烏程霜稻襲人香釀作春風雪水光時復中之徐邈聖
母多酌我次公狂

飲湖上初晴後雨

水光潋灔晴方好山色空濛雨亦奇欲把西湖比西子
澹妝濃抹總相宜

贈別

青鳥銜巾久欲飛黃鸝別主更悲啼殷懃莫忘分攜處

湖水東邊鳳嶺西

唐道人言天目山上俯視雷雨每大雷電但聞
雲中如嬰兒聲殊不聞雷震也

已外浮名更外身區區雷電若為神山頭只作嬰兒看
無限人間失箸人

暴雨初晴樓上晚景

秋後風光雨後山滿城流水碧潺潺煙雲好處無多子

及取昏鴉未到間

白汗翻漿午景前
雨餘風物便蕭然
應傾半熟鶯黃酒
照見新晴水碧天

客路三年不見山
上樓相對夢魂間
明朝却踏紅塵去
羞向清伊照病顏

咏萍限梁字

點點青青浮野塘
不容明月照滄浪
風吹雨逐沙泥上
燕子銜來遶畫梁

八月十五日看潮五絕

定知玉兔十分圓已作霜風九月寒寄語重門休上鑰
夜潮留向月中看

萬人鼓噪憚吳儂猶似浮江老阿童欲識潮頭高幾許
越山渾在浪花中

江邊身世兩悠悠久與滄波共白頭造物亦知人易老
故教江水向西流

吳兒生長狎濤淵冒利輕生不自憐東海若知明主意

應教斥鹵變桑田

是時新有旨禁弄潮

江神河伯兩醯雞海若東來氣吐霓安得夫差水犀手

三千彊弩射潮低

吳越王嘗以弓弩射潮頭與海神戰自爾水不近城

九日舟中望見有美堂上魯少卿飲處以詩戲

之

指點雲間數點紅笙歌正擁紫髯翁誰知愛酒龍山客却在漁舟一葉中

西閣珠簾捲落暉水沈煙斷佩聲微遙知通德淒涼甚

擁髻無言怨未歸

金門寺中見李西臺與二錢惟演

易

倡和四絕句

戲用其韻跋之

帝城春日帽簷斜二陸初來尚憶家未肯將鹽下葷菜
已應知雪似楊花

生平賀老慣乘舟騎馬風前怕打頭欲問君王乞符竹
但憂無蟹有監州皆世所傳

畫雙竹湛師房

我本西湖一釣舟
意嫌高屋冷颼颼
羨師此室纏方丈
一炷清香盡日留

暮鼓朝鐘自擊撞
閉門孤枕對殘缸
石灰旋撥通紅火
卧聽蕭蕭雨打窗

柳氏二外甥求筆跡

退筆如山未足珍
讀書萬卷始通神
君家自有元和脚
莫厭家雞更問人

一紙行書兩絕詩
遂良鬚眉已成絲
何當火急傳家法

欲見誠懸筆諫時

單同年求德興俞氏聚遠樓詩

雲山煙水苦難親野草幽花各自春賴有高樓能聚遠
一時收拾與閒人

無限青山散不收雲奔浪卷入簾鈎直將眼力為疆界
何啻人間萬戶侯

聞說樓居似地仙不知門外有塵寰幽人隱几寂無語
心在飛鴻滅沒間

和文與可洋州園池三十首

錄十
二首

湖橋

朱欄畫柱照湖明白葛烏紗曳履行橋下龜魚晚無數
識君拄杖過橋聲

橫湖

貪看翠蓋擁紅妝不覺湖邊一夜霜卷却天機雲錦段
從教足練寫秋光

書軒

雨昏石研寒雲色風動牙籤亂葉聲庭下已生書帶草
使君疑是鄭康成

荻浦

雨折霜乾不耐秋白花黃葉使人愁月明小艇湖邊宿
便是江南鸚鵡洲

蓼嶼

秋歸南浦蟪蛄鳴霜落橫湖沙水清卧雨幽花無限思
抱叢寒蝶不勝情

望雲樓

陰晴朝暮幾回新
已向虛空付此身
出本無心歸亦好
白雲還似望雲人

瀟泉亭

聞道池亭勝兩川
應須爛醉答雲煙
勸君多揀長腰米
消破亭中萬斛泉

霜筠亭

解籜新篁不自持
嬋娟已有歲寒姿
要看凜凜霜前意

須待秋風粉落時

過谿亭

身輕步穩去忘歸四柱亭前野鴉微忽悟過谿還一笑
水禽驚落翠毛衣

寒蘆港

溶溶晴港漾春暉蘆筍生時柳絮飛還有江南風物否
桃花流水鱖魚肥

香橙徑

金橙縱復里人知不見鱸魚價自低須是松江煙雨裏
小船燒薤擣香薑

南園

不種天桃與綠楊使君應欲候農桑春畦雨過羅紉膩
夏籠風來餅餌香

東闌梨花

梨花淡白柳深青柳絮飛時花滿城惆悵東闌一株雪
人生看得幾清明

觀淨觀堂效韋蘇州詩

弱羽巢林在一枝
幽人蝸舍兩相宜
樂天長短三千首
却愛韋郎五字詩

虔州八境圖八首并序

南康八境圖者太守孔君之所作也君既作石城
即其城上樓觀臺榭之所見而作是圖也東望七
閩南望五嶺覽羣山之參差俯章貢之奔流雲煙
出沒草木蕃麗邑屋相望雞犬之聲相聞觀此圖

也可以茫然而思粲然而笑慨然而歎矣蘇子曰
此南康之一境也何從而八乎所自觀者之異也
且子不見夫日乎其旦如槃其中如珠其夕如破
璧此豈三日也哉苟知夫境之為八也則凡寒暑
朝夕雨暘晦明之異坐作行立哀樂喜怒之接於
吾目而感於吾心者有不可勝數者矣豈特八乎
如知夫八之出乎一也則夫四海之外恢詭譎怪
禹貢之所書鄒衍之所談相如之所賦雖至千萬

未有不一者也後之君子必將有感於斯焉乃作詩八章題之圖上

坐着奔灘繞石樓使君高會百無憂三犀竊鄙秦太守八詠聊同沈隱侯

濤頭寂寞打城還章貢臺前暮靄寒倦客登臨無限思孤雲落日是長安

白鵲樓前翠作堆繁雲嶺路若為開故人應在千山外不寄梅花遠信來

朱樓深處日微明皂蓋歸時酒半醒薄暮漁樵人去盡

碧谿青嶂繞螺亭

使君那暇日參禪一望叢林一悵然成佛莫教靈運後
著鞭從使祖生先

却從塵外望塵中無限樓臺煙雨濛山水照人迷向背
只尋孤墮認西東

煙雲飄渺鬱孤臺積翠浮空雨半開想見之罘觀海市
絳宮明滅是蓬萊

回峰亂嶂鬱參差雲外高人世得知誰向空山弄明月
山中木客解吟詩

梅花

春來幽谷水潺潺的皚梅花草棘間一夜東風吹石裂
半隨飛雪度關山

何人把酒慰深幽開自無聊落更愁幸有清溪三百曲
不辭相送到黃州

陳季常所蓄朱陳村嫁娶圖

何年顧陸丹青手畫作朱陳嫁娶圖聞道一村惟兩姓
不將門戶買崔盧

我是朱陳舊使君勸耕曾入杏花村而今風物那堪畫
縣吏催錢夜打門

南堂

江上西山半隱隄此邦臺館一時西南宮獨有西南向
卧看千帆落淺溪

暮年眼力嗟猶在多病顛毛却未華故作明窗書小字

更開幽室養丹砂

他時夜雨困移牀坐厭愁聲點客腸一聽南堂新瓦響似聞東塢小荷香

山家為割千房蜜稚子新畦五畝蔬更有南堂堪著客不憂門外故人車

埽地燒香閉閣眠簟紋似水帳如煙客來夢覺知何處挂起西窗浪接天

橄欖

紛紛青子落紅鹽正味森森苦且嚴待得微甘回齒頰
已輸崖蜜十分甜

海棠

東風嫋嫋汎崇光香霧霏霏月轉廊只恐夜深花睡去
故燒高燭照紅妝

東坡一絕

雨洗東坡月色清市人行盡野人行莫嫌肇確坡頭路
自愛鏗然曳杖聲

贈東林總長老

溪聲便是廣長舌山色豈非清淨身夜來八萬四千偈
他日如何舉似人

題西林壁

橫看成嶺側成峯遠近高低無一同不識廬山真面目
只緣身在此山中

送蜀人張師厚赴殿試

忘歸不覺鬚毛斑好事鄉人尚往還斷嶺不遮西望眼

送君直過楚王山

雲龍山下試春衣
放鶴亭前送落暉
一色杏花三十里
新郎君去馬如飛

次荊公韻

青李扶疎禽自來
清真逸少手親裁
深紅淺紫從爭發
雪白鷺黃也鬪開

騎驢渺渺入荒陂
想見先生未病時
勸我試求三畝宅
從公已覺十年遲

歸宜興留題竹西寺

十年歸夢寄西風此去真為田舍翁
剗覓蜀岡新井水要攜鄉味過江東

此生已覺都無事今歲仍逢大有年
山寺歸來聞好語野花啼鳥亦欣然

同秦仲二子雨中游寶山

平明已報百吏散半日來陪二子閒
立鶴低昂煙雨裏行人出沒樹林間

書王晉卿畫

斜風細雨到來時
我本無家何處歸
仰看雲天真箬笠
旋收江海入蓑衣

臂痛謁告作三絕句示四君子錄一

公退清閒如致仕
酒餘歡適似還鄉
不妨更有安心病
卧看繁簾一炷香

次韻趙德麟雪中惜梅且餉柑酒

閭苑千葩映玉宸
人間只有此花新
飛霽要欲先桃李

散作千林火迫春

蹀躞嬌黃不受鞭東風暗與色香歸偶逢白墮爭春手

遣入王孫玉掌飛

上元侍飲樓上三首呈同列

澹月疎星遶建章仙風吹下御爐香侍臣鵠立通明觀

一朶紅雲捧玉皇

薄雪初消野未耕賣薪買酒看昇平吾君勤儉倡優拙

自是豐年有笑聲

老病行穿萬馬羣九衢人散月紛紛歸來一盞殘燈在
猶有傳柑遺細君

次韻錢穆父馬上寄蔣穎叔二首

玉關不用一丸泥自有長城烏鼠西剝與故人尋土物
臘糟紅麴寄駕蹄

多買黃封作洗泥使君來自隴山西高才得免人人羨
爭欲尋蹤覓舊蹄

澄邁驛通潮閣

倦客愁聞歸路遙
眼明飛閣俯長橋
貪看白鷺橫秋浦
不覺青林沒晚潮

金山夢中作

江東賈客木絲裘
會散金山月滿樓
夜半潮來風又烈
卧吹簫管到揚州

孟震同遊常州僧舍

年來轉覺此生浮
又作三吳浪漫遊
忽見東平孟君子
夢中相對說黃州

湛湛清池五月寒小山無數碧瓊巒
穉杉戢戢三千本且作凌雲合抱看

知君此去便歸耕笑指孤舟一葉輕待向三茅乞靈雨
半篙流水送君行

溪陰堂

白水滿時雙鷺下綠槐高處一蟬吟酒醒門外三竿日
卧看溪南十畝陰

惠崇春江晚景

竹外桃花三兩枝春江水暖鴨先知萎蒿滿地蘆芽短
正是河豚欲上時

兩兩歸鴻欲破羣依依還似北歸人遙知朔漠多風雪
更待江南半月春

書李世南所畫秋景

野水參差落漲痕疎林散倒出霜根扁舟一棹歸何處
家在江南黃葉村

人間斤斧日創夷誰見龍蛇百尺姿不是谿山曾獨往

何人解作挂猿枝

郭熙秋山平遠

目盡孤鴻落照邊遙知風雨不同川此間有句無人識
送與襄陽孟浩然

木落騷人已怨秋不堪平遠發詩愁要知萬壑爭流處
他日終煩顧虎頭

書林次宗所得李伯時歸去來陽關二圖後二

首

不見何戡唱渭城
舊人空數米嘉榮
龍眠獨識殷勤處
畫出陽關意外聲

兩本新圖墨寶香
尊前獨唱小秦王
為君翻作歸來引
不學陽關空斷腸

王晉卿所藏著色山

縹渺營丘水墨仙
浮空出沒有無間
邇來一變風流盡
誰見將軍著色山

攀確何人似退之意
行無路欲從誰宿雲
解駿晨光漏

獨見山紅澗碧時

次韻楊公濟奉議梅花

梅梢春色弄微和作意南枝剪刻多月黑林間逢縞袂
霸陵醉尉誤誰何

相逢月下是瑤臺藉草清尊連夜開明日酒醒應滿地
空令飢鶴啄莓苔

綠髮尋春湖畔回萬松嶺上一枝開而今縱老霜根在
得見劉郎又獨來

君知早落坐先開
莫著新詩四句催
嶺北霜枝最多思
忍寒留待使君來

寒雀喧喧凍不飛
遼林空啄未開枝
多情好與風流伴
不到雙雙燕子時

鮫綃剪碎玉簪輕
檀暈妝成雪月明
肯伴老人春一醉
懸知欲落更多情

再和楊公濟梅花

天教桃李作輿臺
故遣寒梅第一開
憑仗幽人收艾納

國香和雨入青苔

白髮思家萬里回
小軒臨水為花開
故應剩作詩千首
知是多情得得來

人去殘英滿酒尊
不堪細雨濕黃昏
夜寒那得穿花蝶
知是風流楚客魂

春入西湖到處花
裙腰芳草抱山斜
盈盈解珮臨煙浦
脈脈當壚傍酒家

莫向霜晨怨未開
白頭朝夕自相催
斬斬新一朶
含風露

恰似西廂待月來

洗盡鉛華見雪肌
要將真色鬪生枝
檀心已作龍涎吐
玉頰何勞獮體醫

湖面初驚片片飛
尊前吹折最繁枝
何人會得春風意
怕見黃梅雨細時

贈劉景文

荷盡已無擎雨蓋
菊殘猶有傲霜枝
一年好景君須記
最是橙黃橘綠時

贈武道士彈賀若

清風終日自開簾涼月今宵肯挂簷琴裏若能知賀若

詩中定合愛陶潛

余少年頗知種松手植數萬枝皆中梁柱矣都

梁山中見杜輿秀才求學其法戲贈二首

露宿泥行草棘中十年春雨養髯龍如今尺五城南杜

欲問東坡學種松

君方埽雪收松子我已開榛得茯苓為問何如插楊柳

明年飛絮作浮萍

七年九月自廣陵召還復館於浴室東堂八年六月乞會稽將出沒公乞詩乃復用前韻三首

乞郡三章字半斜廟堂傳笑眼昏花上人問我遲留意

待賜頭綱八餅茶

尚書學士得賜頭綱龍茶一斤今年綱到最遲

夢遶吳山却月廊白梅盧橘覺猶香會稽且作須臾意
從此歸田策最良

杭州梵天寺有月廊數百間寺中多白楊梅盧橘

東南北去幾時歸倦鳥孤飛豈有期斷送一生消底物

三年光景六篇詩

題毛女真

霧鬢風鬟木葉衣山川良是昔人非祇應閒過商顏老
獨自吹簫月下歸

三月二十日開園

西園壯鑰夜沈沈尚有遊人臥柳陰鶴睡覺來風露下
落花飛絮滿衣襟

鬱鬱蒼顏真道友絲絲紅萼是鄉人何時翠竹江村路

送我柴門月色新

慈湖夾阻風

捍索桅竿立嘯空蒿師酣寢浪花中故應管蒯知心腹
弱纜能爭萬里風

此生歸路愈茫然無數青山水拍天猶有小船來賣餅
喜聞墟落在山前

我行都是退之詩真有人家水半扉千頃桑麻在船底
空餘石髮挂魚衣

日輪亭午汗珠融誰識南訛長養功暴雨過雲聊一快
未妨明月却當空

臥看落月橫千丈起喚清風得半帆且並水村欹側過
人間何處不巉巖

食荔支

羅浮山下四時春盧橘楊梅次第新日啖荔支三百顆
不妨長作嶺南人

謝宋漢傑送李承晏墨

老松燒盡結輕花妙法來從北李家翠色冷光何所似
墻東鬢髮墮寒鴉

李委吹笛并序

元豐五年十二月十九日東坡生日也置酒赤壁
磯下踞高峯俯鵲巢酒酣笛聲起於江上客有郭
石二生頗知音謂坡曰笛聲有新意非俗工也使
人問之則進士李委聞坡生日作新曲曰鶴南飛
以獻呼之使前則青巾紫裘要笛而已既奏新聲

又快作數弄嘹然有穿雲裂石之聲坐客皆引滿
醉倒委袖出嘉紙一幅曰吾無求於公得一絕句
足矣坡笑而從之

山頭孤鶴向南飛載我南遊到九嶷下界何人也吹笛
可憐時復犯龜茲

題黃筌畫翎毛花蝶

短翎長喙苦喧卑曳練雙翔亦自奇賴有黃鸝鬪蠟好
獨依蘚石立多時

綠陰青子已愁人忍見東風燕麥新惆悵劉郎今白首
時來看卷覓餘春

寒食夜

漏聲透入碧窗紗人靜秋千影半斜沈麝不燒金鴨冷
淡雲籠月照梨花

移合浦郭功甫見寄

君恩浩蕩似陽春合浦何如在海濱莫趁明珠弄明月
夜深無數採珠人

僕年三十九在潤州道上遇除夜作此詩又二十年在惠州錄之以付過

寺官官小未朝參
紅日半窗春睡酣
為報鄰雞莫驚覺
更容殘夢到江南

釣艇歸時菖葉雨
繅車鳴處楝花風
長江昔日經遊地
盡在如今夢寐中

翠樾亭

一夜飛霜點綠苔
曉庭黃葉埽成堆
簷間翠樾彫踈盡

却放牆東好月來

寒具

纖手接來玉數尋碧油輕蘸嫩黃深夜來春睡濃於酒
壓褊佳人纏臂金

送都監北歸

一聲鴻雁破江雲萬葉梧桐卷露銀我自飄零是羈客
更堪秋晚送行人

睡起

柿葉滿庭紅
顆秋薰爐沈水度
春籌松風夢與故人遇
自駕飛鴻跨九州

春夜

春宵一刻直千金
花有清香月有陰
歌管樓臺聲細細
馣鞶院落夜沈沈

題淨因堂

暝倚蒲團臥鉢囊半窗疎箔度微涼
蕉心不展待時雨葵葉為誰傾夕陽

同景文詠蓮塘

塘上釣簾對晚香
不知斜日已侵牀
江妃自惜凌波韞
長在高荷扇影涼

絕句

柴桑春晚思依依
屋角鳴鳩雨欲飛
昨日已收寒食火
吹花風起却添衣

書辨才白雲堂壁

不辭清曉叩松扉
却值支公久不歸
山鳥不鳴天欲雪

卷簾惟見白雲飛

蘇轍

和子瞻濠州七絕 錄一首

浮山洞

洞在淮上夏潦不能及而冬不加高故人疑其浮也

洞府元依水面開秋潮每到洞門迴幽人燕坐門前石長看長淮船去來

次韻子瞻望湖樓上五絕

欲看西湖兩岸山臥乘湖上木蘭船湖山已自隨人改

更值陰晴欲雨天

眼看西湖不暫來
簿書無算撥還開
三年屈指渾將盡
記取從今得幾回

湖山欲買恨無錢
且盡芳樽對玉盤
菱角雞頭應已厭
鱠鼈馬頰更勤餐

終日清漪弄短橈
久忘車乘走翹翹
秋風已食鱸魚美
洛下諸生未可招

滯留朝市常嫌鬧
放棄江湖也未閒
孤舫初窮千頃浪

肩輿未盡百重山

次韻子瞻登望海樓五絕

山色潮聲四面來
城中金碧爛成堆
不愁門外嚴扃鎖
終日凭闌未擬回

湖色蒼蒼日向斜
煙波萬狀不容誇
畫船人去浮紅葉
石徑僧歸躡白蛇

樓觀爭高不計層
唶唶過雁自相膺
錢王舊業依稀在
歲久無人話廢興

荷葉初乾稻穗香驚雷急雨送微涼晚晴稍放秋山色
洗却濃妝作淡妝

白酒傾漿膾斫紅畫遊未厭月明中樓高只辨聽歌鼓
不見遊人轉似蓬

梁山泊見荷花憶吳興五絕次韻

南國家家漾彩舲芙蓉遠近日微明梁山泊裏逢花發
忽憶吳興十里行

終日舟行花尚多清香無奈著人何更須月出波光淨

臥聽漁家蕩槳歌

行到平湖意自寬繁花仍得就船看回頭却向吳儂說
從此遠遊心未闌

花開南北一般紅路過江淮萬里通飛蓋靚妝迎客笑
鮮魚白酒醉船中

菰蒲出沒風波際雁鴨飛鳴霧雨中應為高人愛吳越
故教齊魯作南風

皇帝閣帖子詞

九門已散秦醫藥百辟初頌凌室冰飲食祈君千萬壽
良辰更上辟兵繒

雨遲麥粒尤堅好日麗蠶絲轉細長入夏民間初解愠
宮中時舉萬年觴

汴上初無招屈亭沅湘近在國南垌大官漫解供新粳
諫列猶應記獨醒

蔣之奇

嘉禾驛

盱江清淺見遊鱗百尺飛橋跨碧津行過水南看更好
風光駘蕩百花春

孤嶺

皎綃剪下碧雙垂歸挹清流背紫微北向更登孤嶺去
此身還傍白雲飛

御選宋詩卷六十六

謹案第二十頁前三行吳越王嘗以弓弩射潮頭
與海神戰自爾水不近城刊本脫此二十字據
東坡集增

第三十八頁後四行元豐五年刊本豐作符據東
坡集及年譜改

第四十頁後二行寒具按此詩見唐劉禹錫集此
編在蘇軾名下蓋沿東坡集有訛





總校官庶吉士臣侍朝
校對官檢討臣蕭九成
謄錄舉人臣李駟